

G.P. 1575 / 21. 9. 1976

NOS MORTS

En pia memoria da
Paul Loretz, Rueras

(Corr.) Aschi anetg vegn la mort, splunta e cloma il fatschentau pelegrin naven da quest mund embrugliu alla clarezia della veta perpetna en Diu. Aschi rapid ed anetg ei era Paul Loretz, in giuven plein humor ed energia, vegnius clamaus dil Segner al davos truament, mo era alla pagaglia gloriusa.

Paul Loretz ei naschius avon 50 onns ell'ucliva de Selva, in vitget pacific e quiet, che dueva denton enteifer ils onns sequents daventar il palancau da disgrazias empau da tuttas sorts. Paul Loretz ei buca staus fegl persul, anzi affon dad ina gronda famiglia purila. Bab e mumma, intelligents ch'els eran, han giu quitau per la gronda famiglia. Els han buca mo dau albiert als affons cun baghegiar e schenghegiar a quels ina gronda e biala casa nova, mobein els han cumpartgiu a quels affons, ella sempladad dil mund da lu, in vera educaziun cristiana. Quella ei stada la rihezia della famiglia e dils affons, lu pli tard ora ella veta. Il bab ei morts ualти baul, bein lu cura ch'ils affons havessen duvrau quei tgamun ponderau. Mo Dieus haveva dau ad els ina mumma pietusa e luvrusa, ina sora dil bien P. Placi Berther, della claustra de Mustér. Quella ha francau il fundament religius dils affons avon che bandunar quei terrester.

En scadin cass han quels affons, e surtut Paul, adina giu ina profunda affecziun per Maria. Gie, nus astgein dir: El ei staus veneratur de Nossadunna tuts ils dis de sia veta. Perquei ha el bein astgau murir la fiasta dil Num de Maria e vegnir satraus per il di dellas 7 dolurs de Nossadunna. Talas coincidencias han savens ina profunda rägisch. Strusch ch'ins ha giavischau ed encuretg tgirunz gidonters per ils pelegrinadis a Lourdes, ei Paul s'annunziaus, quei Paul che ei staus signaus da naschientscha enneu cun ina menda corporala, ch'el ha purtau 50 onns en vera resignaziun cristiana. El va a Lourdes, el meina quels carrs cun aunc pli pupratschs, el pelegrinescha buca meins che 10 gadas a quei liug de grazias. Quei fuva siu pli grond plascher, gie sia ventira. Leu ha el rimnau grazias per siu davos viadi. El ha menau biars all'uncziun dil malsau,



aunc avon zacons meins a Mustér cun caschun della dumengia dils malsau, ed el sez ei morts, provedius cun quellas grazias de nossa cardienttscha.

La sepultura ei stada impressiunonta. La baselgia de s. Vigeli a Sedrun era fullanada tochen al davos plaz. Bandieras si dalla bassa, dall'uniuun dils tgirunz da Lourdes, dallas uniuns dad ils pelegrins da Lourdes da Bildstein e Sargans, la bandiera dall'uniuun da Lourdes Surselva, sia figliola, e quella della cumpignia de mats dela pleiv han dau al defunct Paul la davosa honur. Treis augsegners han celebrau la s. Messa per siu ruauas perpeten.

Al car amitg Paul, al giuven exemplaric, al veneratur de Maria schein nus: Sin seveser! Seigies nies mediatur al tron de grazias. Ruauissa en pasch!